

王文公全集之而谷詩存

# 齋詩稿

璧山王儀修元文著

## 齋齋詩稿 卷之五

而谷王宜撰

上元昔思 1993 年癸酉歲

又值元宵舊夢溫，此時還舉昔年樽。壁城狂態追珠履，吳市閑情醉旅魂。陣陣煙花車似水，煌煌燈火夜如暈。即今靜坐聽遙響，眼底仍多過去痕。

### 哲惠公九十陰壽獻辭

癸酉之春，正月之吉。值公九旬，日維念七。雨水節來，澤深可必。公之辭世，己卅二年。赤馬紅羊，天運聯綿。坎坎坷相接，賴庇偶全。自今而後，修真思過。謹守素懷，永矢勿愆。公德宏揚，慈恩遙播。

### 題古開弼林業論著二首

問君之富指連山，從古執林事太艱。藉樹必將窮眾力，虞衡爭利病江關。

護土防沙千里牆，青山綠水繞迴廊。更能吸碳還呼養，功烈當封異姓王。

### 古琴篇

七絃燒尾琴，倚壁俟知音。雁落雖仍歸，塵封竟至今。相如身病渴，俞伯淚沾襟。神遇何年可，哀哉梁父吟。

### 書廣朋公像贊後

不肖年六十，五叔來蝸居。端誦公像贊，恍憶四齡初。公病臥牙床，飲食俱床上。我蹲床踏板，魚頭最欣賞。一日偶成睡，值公上賓天。醒來罹怪疾，累月將棄捐。祖妣忽得夢，老人還花至。晨起占勿藥，果然竟無事。而今細想來，寧非公蔭哉。像贊盡形容，靈光耀九垓。

### 讀朱文公釋氏論三首

假合樓臺幻彩虹，一經拆卸全然空。破題起講鈔莊列，八股

雖長盡斷蓬。

四十二章我佛參，只如中土老生談。後來衲子爭雄聖，謊語偷文竟爾貪！

要義无多竊老莊，自謁神話誕而長。頗驚流俗終何用，怪語虛誇計未藏。

### 重玄二首

重玄大道相連，足令形神億萬年。心死自能登活路，此身由我不由天。

復命功夫在自身，築基鍊己最艱辛。愚人懶散說修性，離命何曾有性真。

### 題錦上添花畫扇

彩畫勿庸繪鳳兮，人間天物最堪師。蒲公英後承金盞，王后風流逞玉姿。夢裏春駒雙鼓舞，蓬中鸚雀獨遊嬉。錦翎石上今昂首，麗唱聲傳萬種宜。

### 午夢舊遊

幽廳笑語情猶昔，曲徑迴廊半侵苔。鴻影不知何處在，水流花謝我還來。

### 顯謨五叔挽辭

純方赴蓉評高卷朱振雲言公作古靜修奔喪馬鞍丘哀悼不勝遙此致弔

噩耗傳蓉市，聞公已上仙。初驚疑耳目，終恨隔人天。白馬悲中路，紅羊痛往年。一生居草野，无日見坤乾。

### 悵望

九月初三在沙坪開校友年會阻雨未赴

西風挾雨上高樓，悵望沙坪几水流。舊好緣慳越卅載，同窓誼重足千秋。人生苦短離何久，世事多艱老未休。如馬虺隤行不得，露珠弓月影徒浮。

### 立冬漫興

老我立冬帶病身，菱花搔首自相親。聲聲風雨凌松竹，陣陣笙歌樂鬼神。將繼春秋銷妄想，欲迴天地與畸人。從今做穩華胥夢，定見紅塵換綠茵。

### 一笑

陰雨久，轉新晴。蓬壁生輝日色明。歷事百憂長樂在，出門大笑大江橫！噫吁嚱，出門一笑大江橫。

### 論詩

論詩何必古，情志不須佗。岳髮沖冠怒，文謚正氣歌。兩篇光日月，千載壯山河。翰苑奇才有，幾人更足多。

### 冬至信筆

一陽生自子，萬彙漸回蘇。碧艸春長在，黃花老不枯。濠梁魚獨樂，山木鳥相呼。冬至年何許，千門待換符。

### 流星曲

一顆流星破碧空，光芒四射耀寰中。明麗溫馨向我衝，手握神矢關強弓。驚心動魄一陣風，只見來初不見終。當年原為吳市蜚，偶然相戲偶相從。開心得意傍霓容，無間晨昏聲喁喁。勿忘我花白不紅，五子峰高情向濃。思深念切憶新逢，已隔雲山千萬重。

### 天河

天河璀璨眾星橫，各洞神仙汗漫行。但怪紅塵冬至後，猶聞砧杵報秋聲。

### 立春

斗柄指青龍，迎春即送冬。催開嶺上梅，獎掖後凋松。

### 心濤歌

維大地迥青天高，往古來今繭自繅。此外何物更堅牢，有情能不湧心濤。

**堪笑** 歐俗四月一日稱愚人節，親友可打謊語矇騙一時，以為笑樂。此憶舊

情而作

豈足欺人聊自娛，舊朋凋謝片雲孤。衣冠可換神難換，世勢雖殊意未殊；泥我當時緣謊語，問君何術保衰軀？數十年來鬚髮白，堪笑終歸舍也无。

### 清明節思親

清明日出沐春暉，別領鄉關未及歸。欲戲斑衣賡老萊，紙錢都化影雲飛！

### 暮春

花漸闌珊手漫搓，玉簪新靸欲婀娜。无端惆悵緣何事，自覺人生苦趣多。

### 亡是公

長江水逝東，天道比張弓。搔首憐華髮，更衣惜惠風。猶生千慮在，除死萬緣空。歲月今非昔，紛紛亡是公。

### 寄意

葉茂枝繁綠勝紅，陽春脚步正匆匆；子規啼盡心頭血，楊柳飄殘雨後風。恰好開窓迎白日，何須鑿井索青銅。慘舒自古恒相續，認取雲天棗籥功。

### 兩當軒集後

用余鵬翮《與仲則》詩韻

不因懊惱亦開滕，愛此商音似飲冰。眾鳥下原餘落日，長雲度嶺暗孤燈。寒蟲咽露悲窮士，苦雨鳴廊惡佞蠅。《感舊》《觀潮》皆絕響，緣情我輩可能勝。

### 夏日

炎夏禾風息，林深幸晏如。狂濤危斷岸，烈日困窮閭。暑氣憎何用，寒居嘯有餘。耽吟潛眺句，愛讀耳周書。泥路成陳迹，真心守散樗。惟懷新舊雨，那得更相於。

### 蜀僑惠我紅梅圖

一樹紅梅絢爛開，全身鐵骨管城栽。暗香入夜妻憐復，止水留人鑑類駘。品格僅容松竹擬，風神難可妄庸猜。吳江三弄真奇絕，展卷欣然見曉來。 蜀僑又字曉來

### 題大風堂畫解（張顛竹下握髮作書）

竹林繼踵久無聞，半世羈孤見此君。鳳逸何曾忘歲月，龍蟠竟至惜風雲。張顛酒後精神出，任昉詩中涇渭分。十丈紅塵腥刺鼻，聊招大老與同群。

### 悵神

閱盡炎涼欲八旬，頭顱輕拍尚天真。關山到處留陳迹，湖海從今作細民。過眼煙花香偶在，惱人春色夢難勻。平生幾度臨歧路，為我新來更悵神。 為我揚朱也

### 鬱金香

鬱金香泛樂嬋媛，玉軟莢柔色可餐。風月於今常在牖，花光從此不離軒。琉璃並結交歡蒂，玳瑁雙棲戀睡鴛。君問此中深幾許，三春油沛九冬暄。

### 凡心

一年容易又秋風，苦雨鳴廊意興窮。澡雪凡心情惻惻，他生難卜此生空。

### 中秋有雨三首

花自飄零水自流，一杯獨酌又中秋。當年皓魂今何在，雲雨荒唐瑣玉樓。

月餅无心滯水仍，四民渴望却難能。縱然如此蕭蕭夜，猶為窺窓幾度興。

中秋无月節依然，絲雨迷濛太可憐。人世陰晴何足論，明年飛鏡定當天。

## 重九

將欲登高去，黃花尚未開。白衣人无酒，却送暗香來。  
酒宜秋士飲，花為達人香。不老饒佳節，清茶自品嘗。

## 純方四十之慶

不惑能令德業隆，且看苜蓿奏膚功。佻離非歲休憎命，造次无心絕似翁。柳絮已曾吟白雪，海棠依舊笑東風。釀春漸覺香浮動，從此遨翔百順中。

## 齋齋放歌 新號齋齋

七十以前逐物累，辛苦年年足世味。七十以後滌塵污，始知學道齋為貴。玉鏡懸門欲照妖，金劍掛牆欲斬蚊。百怪掃除天地清，化聲相感如風簫。獨坐北窓意何遠，春秋疊運往復返。平生有懷當展成，太公八十未為晚。

## 憶夭折諸弟

年來身外事，巨細不關心。惟諸孩提伴，笑貌還相侵。猶憶少全弟，夢虎母懷妊。聲宏步矯矯，力大目沈沈。父輩析產年，狂風摧大木。清晨虎下崗，齧人到林麓。我家主僕多，刀槍迅殺戮。少全突夭折，一家盡痛哭。又憶爵修弟，身健逾群兒。與我嬉高堂，誤擠墮階墀。香灰塗額傷，止血竟得治。我上縣中學，久不相扶持。一夜夢初回，心痛如弦斷。次日趕回家，足娃折夜半。已葬竹林下，小墳不復旦。悲失一面緣，從此絕狎玩。還憶明淵弟，有孃欲承桃。尚在繚襪中，母逝兒失嬌。祖母愛憐之，撫育心拗拗。養未及三載，小弟終自凋。人生原如寄，諸弟去太早。大姐不及面，去世亦艸艸。世間鬼魅多，早去固亦好。惟我未了情，相思以為寶。

## 歲暮思親

日居月諸歲雲暮，靜坐思親覓好句。吹笙飛帛仰宗風，迴阪臥冰欽故步。首思祖考煥高公，尔雅冲淡溢真趣。悠然閑吟千家詩，玉振金聲仍見素。乃逢大旱井亦枯，午夜挑水十里渡。祖母龍氏最慈懷，撫我姊妹勞維護。宅前熟土強鄰奪，據理索還无所懼。除夕我嗔无新衣，誠默勿令父悲苦。艱辛我父哲惠公，徒有文名時不遇。屢遭禍患愈堅忍，皇皇弘才无用處。贏得鄉親樹口碑，私諡和愍揚九據。慈母劉氏諱敬容，三十五歲上泉路。育我存亡八口丁，哀哀劬勞難具訴。最是彌留尚相許，病癒為我納新履。念我夢親成永訣，小子无狀當深慮。千錘百鍊作全人，除舊佈新應有數。

### 尤悔

平生无大過，此日疚尤心，尤附殘年去，疚成瞶瞶瘡。

### 豬狗

狗歲汪汪去，豬年得得來。絕塵當掉臂，襟抱向誰開。

### 乙亥早春 1995 年乙亥歲

上元何所似，但覺夜窓虛。細雨春初到，微風柳始舒。盆栽塞尚怯，池養意相於。閑坐忘憂樂，怡然澹與居。梅信催紅綻，七星運帝車。曉風新古木，遠思寄赫胥。花夢成殊綵，濠情注細魚。此時心自可，不用問年豬。

### 恍見和愍公 清明晨起，忽感見之，成七律二首

半世勞生慣慘舒，謁公今況夢回初。鯉庭趨對留三訓（自立自治自助），石室藏書念五車。尚儉不曾披錦繡，覆盆一再困蓮篠。哀哀數十餘年後，猶復相响衛大樞。遇公非夢祇依稀，發發飄風見化機。餅罄咸知維疊耻，莠蓼略攸竟蒿菲。僧虔遺願龍何在，老萊斑衣鶴不歸。才望他年徒寄託，眇躬今幸沐春暉。



**朱頂蘭** 新栽此花，葉大莖粗，孤挺空心，五花分指，外紅內白，平向五方，

无香指佞，以詩志之

從來朱頂便為蘭，宅畔新栽正可觀。孤挺花開紅內白，壯肥  
葉舉厚中寬。海棠差近神仙伴，屈軼能消惡佞端。混處石昌  
心自廣，潛移怒翼作鵬搏。

### 乙亥端午

梅黃桃熟麥風清，雲影天光共一觥。結艾為人猶配戴，懸蒲  
作劍亦縱錚。蝦蟆依草將忘噪，知了藏枝不肯鳴。冷落欲尋  
端午迹，但聞江上湧波聲。

### 中元偶成

老榦槎枿醜硬沖，新枝條暢復橫空。任隨四季陰晴別，所不  
能忘只雨風。

鳧脰不長鶴脰長，取長補短費商量。一年幾個稱蘭日，惟有  
天花到處香。

### 江津二中辦校七十年

一聲木鐸几江邊，彈指鬢門七十年。脂粉隊中傳法語，烽煙  
場外習真詮。誠如孟子欣三樂，僅效文翁化四川。際遇神州  
開放日，好占弦誦勝從前。

### 閏八月初吉

勝氣溫高夜不眠，却來復氣冷相連。秋分既過閏八月，杜子  
北征實偶然。我喜閏月太陽好，九里香騰玉几前。人生多故  
當存性，宜配韋兮勿配弦。莊生得魚固忘筌，不忘濠上魚鱣  
鱣。

### 題曉來《非非》之作

赤馬紅羊大劫年，南天北地鼓填填。臂纏紅衛真凶也，勢迫  
離婚亦偶然。忍見春姑人上吊，怯聞柳妹夜投泉。低回最痛

猶流毒，是是非非總可憐。

### 近明《災難》書後

七災八難是人生，紀郭艱危實可驚。打倒當權稱造反，室家縱好界須清。

### 詠史二首

劉項當年較霸圖，鴻門宴上不含胡。武莊須勇輸文伯，俊傑貞臣兩故吾。

樽俎杯殘野戰酣，轅門投戟雪毵毵。十年養狗皮毛好，一為紅顏便不堪。

### 題囚赦將軍書三首

伐謀上計下爭城，林（功德林）內攻心不用撈。伊呂何曾先作間，張（宏範）吳（三桂）原是早通聲。洛陽花好寧無價，華表龍高詎有情。帶劍難尋乾淨土，應悲神聖美佳兵。

輕搖彤管譜春秋，孽子孤臣次第收。憂患半生哀履善，艱難一死恕承疇。身留北地心何樂，背向南天面尚羞。獨有當年黃十二，還將永動作仇讎。

開天古史記浮沉，筆下生花似自臨。偶讀四愁誰昨夢，一彈三嘆尔知音。攀龍術妙爭新坐，順水船高擲舊簪。世事徒令傷往迹，閑情迴蕩漫長吟。

### 七三自頌二首

雲端天路發狂癡，抖擻精神且鼓吹。道典重修因佚稿，老經再注賴閑居。五車惠子無人識，一部文規只自奇。七十過三何所望，有言如此足療飢。

悽惶遠數東家丘，匿蹟潁濱亦到頭。我匪外王仍在世，君能內聖始經秋。南華十萬箋緣了，白酒一杯庶務休。斗室猶寬天地窄，忘貧忘病復何求。

### 釣三首

電閃雷鳴日，心驚膽顫天。惟君披鶴氅，穩坐釣魚船。  
持竿臨北海，昂首對東風。誰知魚龍舞，全躍在胸中。  
線曲長城似，鉤彎曉月如。河山原有意，定不嘆居諸。

### 歲暮偶成

歲暮天寒望遠峰，北窓獨倚想前踪。心遊目送三千嶺，雨散  
雲飛五十冬。碧海迷茫人寂歷，丹山靦黷影惺忪。倘求玉杵  
靈霄殿，可讓刀圭手萬春。

### 長風

唾壺斫案氣如虹，豈可衰年此念空。雨雪雖嫌衣著少，何妨  
開戶待長風。

### 老杉

除腐生新周徧威，百年能得幾揚帆。素娥青女橫陳夜，衝破  
淫威有老杉。

### 橘枳

既云水做見清儒，又道成災有曼殊。好惡由人无足怪，淮山  
橘枳本同株。

### 盆栽臘梅

鐵骨瓊姿霰雪中，自傷自笑轉從容。黃為本色何輪白，綵固  
時興不但紅。香遠益清孤向月，曲高莫繼燒如桐。悲哉託此  
非吾土，有淚欲彈顫曉風。

### 讀曉來感時詩

普天競拜孔方兄，涇渭合流子獨清。慧業難容阿堵物，文章  
最好步虛聲。雲山縹緲原无意，雁陣橫斜似有情。萬象崢嶸  
塵夢醒，幾人否滯幾人亨。

### 諱死吟

1996年丙子歲

九死吾何悔，一生忒險哉！骨衰足不舉，筋柔手難擡；眼霧徒開卷，耳聾枉聽雷！雖无他苦處，即此已堪哀。

### 老病

花生豆腐酒三杯，不覺陽春撲面來。世事百年容易過，任他老病更相催！

### 紅情 三月十八夏至作

紅情消瘦綠添肥，九十春光七八非。桃李无言蹊自廣，陰陽失序節仍歸！鳴廊雨急鐘聲緩，傍嶺霞飛草露晞。烏兔經天升又降，分明流轉見玄機。

### 新晴

春去堂堂宿雨收，陽光遍照樹陰樓。葉猶嫩綠分濃淡，蝶已輕翻忽墜浮。久雨初晴心漸暢，大丹却病體仍遒。十年退坐塵囂裡，欲起閑身訪舊遊。

### 拙政園搖思

一別名園五十春，百年過半有餘身。无忘我草風前偃，五子山峰雨後新；花似綉球依綠葉，橋真曲析避紅塵。迴廊畫院今何在？惟見長江濁浪鄰。

### 靜勝 今年處暑後熱猶甚，然白露將至一雨而解。

曷喪千年日尚然，神州草樹正枯煎。盼來一陣及時雨，掃去三伏要命天。爽氣穿窓容易躲，好風拂面不勝妍。關弓十射追魂後，殘剩炎威那似前。

### 惠濱茶社

自帶香茶去惠濱，滿堂茶客兩三人。高聲低語隨君便，半日清閒半載春。

### 望江茶樓

茶樓脚下湧長江，隔岸江津醉月樁。幾個老頭聊舊話，曝言

同調不同腔。

### 丙子秋興

殘陽返照色新鮮，大地群生狀更妍。古易初成不嫌晚，舊詞重彈或勝前。月桂飄香傳萬里，金丹添算動三千。明朝誰健登高去，精復神全即是仙。

### 憶姑蘇景物

苜蓿蝸居笑我儕，一生天命與人乖。韶年問學游吳會，有脚不穿夫子鞋。閑訪姑蘇佳麗地，林園處處鳥喈喈。楓橋垂暮寒山老，寶帶新橋與舊排。船女采菱呼共渡，石湖串月雨侵厓。節蔚宜人香雪海，曼殊最嗜采芝齋，每過子胥喋血處，却思少伯刺舟來。難忘姬姓興邦事，闔閭建後夫差臺。臨頓路中觀月影，狂歌醉舞東北街。大庭曲戶迹難再，觀前宮巷總縈懷。五人墓近真娘墓，英雄美人安在哉！獅子林中石舫頂，滄浪亭外可園梅。揚鞭野興當年事，無人輕狂拾墜釵。向老緣情思往迹，已忘誰與我同偕。

### 丙子生辰四首

去歲殘冬近死人，今朝七五慶餘生。雖然未即歸天去，但恨无才避暴秦。

第一平生慕老聃，三玄初就髮氍毹。手脚失靈難有用，永年宜在此中探。

秋去冬回坐北窓，年年望眼落長江。幾多幽思真難說，七五年中道可慙。

前路窄寬綠樹遮，行行祇見滿天露。擡頭莫問若來往，只應駕好狗拖車。

### 冬興二首

去年曾爲臘梅嘖，話醜理端事亦真。願學風仙終待彼，免遭

莊子笑陳人。病非得已常忘藥，道在知幾不問鄰。佳境從來隨處是，祇須和氣便生春。

脫帽鞞鞋說鍵川，桃風蓮月滿人天，桂花開了臘梅笑，二子箋成古易連。豈慕鍾期彈絕調，難忘陶令鼓无弦。吉凶咎悔由中出，獨坐北窓思萬千。

### 歲暮贈樂近明二首

歲歲同窓樂近明，學優不仕但修齡。道場獨詣倡三度，藝苑多才立九成；把晤緣慳仍舊誼，奔馳時速又新正。古稀冷落吳江渡，何日重聆奏玉箏。

自傷毛仲坐虛堂，麗澤迢遙水一方。心志相孚真莫逆，芝蘭盈室不聞香。他山攻玉承詩教，梅使寄春類楚狂。落月屋梁賡杜夢，興桑處遠豈能忘！

### 又聽鄉間罵狗官

雜文報九七年元月十七日有文如此，以詩志之。

刮地剝皮力未殫，行人戲指无心肝！紅裝素裹還稱美，又聽鄉間罵狗官。

### 早春有思四首

1997年丁丑歲

鳥盡雲閑際，蜀山殊未悲；謫仙隨水去，此意倩誰知。  
紅葉紛紛墜，青枝漸漸芽；因風飄落後，春氣孕千花。  
群生衰復盛，逝者水東流！日月爭來往，何時競始休。  
綠柳漸迴綠，青山依舊青；欲知常變理，且讀古黃庭。

### 蜀僑寄我《山雨濛濛》圖，暮春題

青山隱隱雨濛濛，春樹春花一例空。不是有心藏色相，祇緣吹可萬不同。

### 偶書二絕

風靜葉還落，花香鳥自飛，古今多少事，何用計從違。  
事理說難透，言行顯易明；秦皇思萬世，轉眼亡于嬰。

## 題書櫃

總角兒郎白髮翁，鈔鈔讀讀亂塵中；汗牛衝棟知多少，滿腹經綸耀晚風。

## 香港歸來

金甌三缺百年餘，今有香江返故居。林子焚煙驚賊膽，關公戰海護儲胥！稱商英美雖非寇，略地日俄總近狙。何用大祝遮所願，萬千遺庶尚歔歔。

列強東漸逞淫威，清季天朝嘆式微。咎閭百年推久遠，令威千歲尚來歸。小嘗殘瀋嗟甜美，大失膏腴味是非！扭轉乾坤誰杰士，滿園春色始芳菲。

攜來備貝儘輝光，百五禁煙昔共嘗。今日榮歸思小鄧，當時淪喪恨諸強。洋場十里猶能識，故土一年也欲狂！願慰相思蒙半面，真人難遇費長房。

## 三改《古易經大義》稿

右偏癱瘓近三年，古易亦經此再箋。吝閨不同兼馬象，鍵乾自異況坤川。決疑有卦含真義，算命無繇任亂詮。守信雖承吾父教，恨難一字到黃泉。

## 秋望

望江樓上品閑茶，水漫河洲略見沙。渡口旅人來去急，樹頭蟬韻短長譁。暑時已過熱猶盛，秋葉微飄日漸斜。莫道節臨涼氣候，宜將天運付天涯。

## 人權

自主自由且自尊，一樓三柱最人根。登臨始見乾坤大，容尔鵬搏鳥化鯤。

## 中元有感

人生嘆命促，我幸七十多。欲停蹢躅步，其奈鞭策何。古人

吾不見，彭壽或傳訛。我家五子喬，緱山徒摩挲。仙人丁令威，歸來留一歌。心願祭中元，南山仰峩峩。俯視長江水，一浪湧千波。凡動皆歸靜，諸事每蹉跎。任運非聽命，能忘氣自和。

### 疑釣

世久欽垂釣，得魚招酒徒。廚師調味美，不見月明珠！  
一竿到水湄，四罟變溪池。岸上人何樂，水中物正危！

### 樂蜀僑筆墨續二首

閬苑瓊英字與詩，百年難得此神奇。遠山近水橫斜出，自有天才自不知。

龍騰虎躍勢非驕，吟寫憑君一玉簫。欲借此中十八拍，琵琶絃外韻尤超。

### 樂蜀僑詩存二首

哲人容易作詩人，意厚情深道已真。物境莫愁齊一少，有慈有勇足精神。

當年嘗試有適之，今日詩存絕妙辭。滿腹珠璣隨口出，大如江海小清池。

### 訪伶仃洋追次文文山韻

烽火當年我亦經，時移世易髮星星。凋殘歲月山中楚，指點功名水上萍。習贛舊夢惑險阻，弔忠語拙歎伶仃。乘攜浮海非尋樂，微浪无濤眼自青。

### 遊珠海

千里遙程自北溟，鵬飛鯤化仰儀型。天邊白浪搏聲急，地角黃舡走勢綱。但見青山多嫵媚，猶聞碧水歎伶仃。旁人笑我老不死，危坐艙中細細聽。

### 小住怡美閣



中山市畔中山港，怡美閣高老却來。玉帶水連倉板水，詩書臺引鳳凰臺；溪邊竹樹海濤濯，樓上瓊瑤雲岫栽。一笑披襟中自可，爲人謀福繼三槐。

### 過廣州市

陸賈能言說趙佗，千年見證剩珠河。高樓林立通仙境，公路密橫競澤梭，貪水何曾迷本性，神羊難得定殊科。車中閉置遊街市，拂柳穿花念曲渦。

### 人日抒情戊寅歲 1998年起

七日剛來正入春，身經多故念天倫。不分長幼心皆痛，初想音容鼻已辛。我亦如人堪白眼，才无可用墜紅塵。行將八十何求也，唯願世間百福臻。

### 初八夜夢

我今七十六，人見輒稱老，乃初夢吾父，心喜如幼小。上樓我先至，門開來三考，第一是爸爸，見之如獲寶。跳躍上前迎，握手復相抱，第二醒來忘，相親恨不早，第三介文兄，說話記艸艸。三考久心縈，日思夜見了。可惜夢醒後，一枕境皆杳，爸爸更老成，像永留吾腦，大哥轉年輕，告語多未曉，夢去百不知，夢話似不少，存亡兩无別，皆我人倫表。

### 二月二日

二月二日江上行，義山詩句古今情，邇來已有千年隔，猶聽灘聲似鉦聲。

### 哭老友封思善教授

五十年前早識君，公餘言笑最情殷。小姑先品廚中菜，几水難留嶺上雲。在昔步趨憐同事，而今老大惜離群。忽驚噩耗傳津報，不待讀終淚已紛。四月廿一日，偶見江津報載陳發明唁語一則，驚考老友已于四月九日病逝。遂深夜獨坐北窓，艸成一律，素車白馬之約，已負今

生，隻雞斗酒之情，亦慚此日謹以此詩，權作挽歌云。

### 獨坐二首

獨坐虛齋裡，臨窓學蠹魚。不材非世器，任性等山樗。前途  
瞻曲徑，遠景想穹廬。案右三玄在，還當讀道書。

獨坐玻窓下，陽光耀眼新。身閑千事了，心靜四時春。來識  
誰真偽，漫論彼主賓。山川猶昨日，何用嘆陳人。

### 觀漲水

久罹相如渴，茶寮日一臨。閑觀江水漲，旋見島沙沈。蟬唱  
杳何處，柳腰擺不住。今年閏五月，毒熱也未侵。

### 獨賞集初選告成

全五冊，今成第二冊。

華夏詩歌古至今，集成二冊盡唐音。繼承古絕多光大，獨創  
七律足誦吟。杜儒李仙騰衆口，西昆縣尉愜初心。僧道以來  
非所選，此中最賞笛和琴。

### 心境

春風吹綠柳千條，牧笛無腔過板橋。此境心中留已久，不勝  
長日雨蕭蕭。

### 不再

日日晝還夜，年年春復秋。光陰輪不轉，好似水東流。一去  
何時再，請觀海上漚。

### 戊寅中秋二首

碧海青天夜夜心，姮娥遺恨實難禁。第第總躲中秋節，今夜  
依然不肯臨。

三五天晴好箇秋，却無圓鏡興全收。忍思往事思今事，非爲  
太牢爲解牛。

### 中秋待月花下

晴日宜秋待月涼，桂花香溢漫思量。嫦娥有恨偷靈藥，費氏

何心隱秘方。萬里空留虛靜境，一時只見无何鄉。閒情幽遠真難說，獨步渦河住蝶莊。

### 題封思善老友留照

段女秋日代送亡友封君生前永川公園留照。

兩丸競走若輪轉，不覺已奔五十程。形影猶然昔日貌，精神依約舊時情。嚴生羨尔從容去，前路聽吾款段行。何處可飛何處塞，祇聞鴉叫不天明。

一見形容半渺茫，紅塵舊影結人腸。他山玉已不攻錯，此日心却只感傷。文業垂成期美善，佳名才就隔陰陽。東窓白酒難同啜，空欲題詩問彼蒼。

### 改唐彥演金陵懷古爲慨古

秋意幾多宿雨收，桂枝香散滿神州。登高有酒全忘醉，慨古无言獨倚樓。宮殿歷朝留舊迹，衣冠經歲剩荒丘。太平縱改天不改，山自青青水自流。

### 第二戊寅歲誕辰

已過炎涼七六冬，一身辛苦隱猶龍。南窓念載思玄冊，西蜀百年養病容。父母劬勞恩无極，世情冷暖劍千鋒。至今老大人心仍熱，愛賞金花放重重。

### 數九歌

改編

一九得九，懷中插手。二九一十八，田裡无蝦蟆。三九二十七，多把火籠提。四九三十六，小孩冷起哭。五九四十五，開春不消數。六九五十四，柳苞如長刺。七九六十三，行人把衣寬。八九七十二，長亭去歇氣。九九八十一，農夫把田力。

### 冬溫

殘歲冬溫雨水少，微陽黃濱天顏好，江湧急流世寂歷，江山多故却不老，浪濤任變人留迹，年去年來何日了。天長地久

人奈何，衣但求暖食求飽。世間底處覓神仙，此中或有蓬萊島。

### 子夜冬歌

遙望蒹葭露，伊人藏彼處。冬風寒刺骨，強去舟莫渡。且喜歲之余，微陽當有助。頭顱已半白，心事實難吐。遠揚寧守拙，閒情隨自恕。

### 除夕吟四首

夜雨掃塵大地清，早晨又有鳥鳴聲。他年祇聽哀鳴叫，年盡却令野叟驚。

太陽一出滿天黃，不比夏日白且燭。除夕每常多風雨，今年除夕亮堂堂。

香燭錢紙祭祖宗，親人遠矣我龍鍾。今年未曉明年事，拜罷親人醉依筇。

足蹇難行心暫遊，碧落黃泉兩處求，七十多年人世慣，不知天上可牽牛。